

empini
uDutheronomi 20

Esikhathini sanamuhla iyaxwayisa ithuthumelise imibiko ngezimpi okuthiwa zaziholwa zibhebhezela nguNkulunkulu, kunguyena ojuba amabutho, ewanqobisa. Okuthuthumelisa du yimininingwane nemiyalo kakhukhulela-ngoqo okwakufanele igcinwe „ezimpini ezingcwele“ ukuze kusale kovalwe ngehlahla kwabezizwe abanqotshiwe.

Kusemqoka-ke nokho kithi namuhla ukuthi sazi ukuthi kwakuyinqubo yakhona leyo ngalezo zikhathi kuzo zonke nezinye izizwe abakwalzrayeli ababakhelene nazo. Lo mlendo okulesi sahluko uzama ukusikhombisa indlela okwakuzanywa ngayo kwalzrayeli ukuwaxegaxegisa amafindo omthetho noma-ke ukuyiphendula inqubo namasiko kuhambisane nenkolo yabakwalzrayeli eyayizama ukuba msulwa. Khona lapho nje-ke kuyamangalisa ukufunda ngemibandela eyayiqondiswé kwabajutshelwe ukuphatha izikhali bahlasele - le mibandela ikhombisa iso elibanzi nesihe esingasavamile namuhla kwabaviva ngezikhali.

Uma ninqwamana nesitha esinamandla kunani, esihlome nangezinqola ezidonswa ngamahashi, ningesabi noma kunjalo. INkosi, uNkulunkulu wenu, owanikhulula eGibhithe, noniholayo kuze kube namuhla lokhu, akasoze anishiya nodwa nalapho. Kodwa-ke ngaphambi kokuba kuze kulwiwe, kufanele ukuthi umphristi abayale abajutshelwe ukuyokulwa, athi: „Madoda akwalzrayeli, niyaphuma-ke manje niyobhekana nesitha senu empini. Yimani isibindi! Ningesabi, ningethuswa ubuningi nangamandla esitha. Qondani nje, ningalokothi nihlehlele emuva noma besondela kangakanani! INkosi, uNkulunkulu wenu, ihamba nani njengoba niphuma nje. Iyanilwela, iyaneseka ekulweni nesitha senu.“

Emva kwalokho-ke iziphathi-mandla kwezezikhali nasekuvivinyeni amabutho zizoqhubeka zithi: „Kukhona yini phakathi kwenu oqeda-kwakha indlu, ongabange esaba nalo nethuba lokufeza izimfanelo zokuyethula emphakathini ngedili njengokwesiko na? Akaphindele ekhaya khona manje ukuze kungathi uma esala empini, indlu yakhe ithathwe ngomunye! Kukhona osanda-kudabula insimu entsha yomvini, ongabange esaba nathuba lokubutha isivuno sokuqala na? Akabuyele ekhaya ngokushesha ukuze kungathi uma esala empini, isivuno sezibulo sizuzwe ngomunye! Kukhona yini osanda-kuqonywa, ongabange esaba nalo ithuba lokuganwa? Akabuyele ekhaya khona manje ukuze kungathi uma kwenzeka esala empini, intombi yakhe ithathwe ngomunye!“ Ziqhubeke iziphathi-mandla, zithi:

„Ukhona yini onovalo, osesabayo isitha? Akaphindele ekhaya khona manje ukuze angatheleli abanye ngovalo, abathene amandla!“ Zithi zingaqeda-ke iziphathi-mandla, bese zibeka izinduna zamabutho, ziyiphake impi.

Ngaphambi kokuba nihlasele, khulumani nezakhamuzi zalapho, nibonisane ngendlela ingxabano engaxazululwa ngayo ngaphandle kokuthathelana izikhali. Uma nivumelana, bavuleleni amasango, bangene; (esikhundleni sokubahlasela) nibagqilaze, banikhonze, banisebenze. Uma ningavumelani, bebona kungcono behlulwe belwile, hlomani nihlasele. Uma iNkosi, uNkulunkulu wenu, ininqobisa kuleyo mpi, bulalani nishiye kuvalwe ngehlahla; nixolele nje abantwana nonina namaxhegu. Imfuyo nakho konke okulapho ngokwenu.

Zithatheleni konke; nipiwa yiNkosi. Kuyo yonke imizana ebuqama kunakini nihlale nenza njalo nje; kwenakhelene nayo-ke kodwa ezweni iNkosi eniphe lona, ningalokothi nishiye noyedwa nje ephila. AmaHethi, amaAmori, amaKhenani, amaPherisi, amaHivi namaJebusi aqalekisiwe; niyowashaya niwabhuqe njengokusho kweNkosi, uNkulunkulu wenu. Okungenjalo ayozama ukunilutha (= Nawadembesela nje, ayoniphendukela, aniluthe), anigilise yonke imikhuba le ayenzayo edumisa izithixo zawo, aniphambukise ekukhonzeni kwenu iNkosi yenu.

Uma kuthatha isikhathi eside ukuthi niwunqobe umuzi eniwuhlaselayo, zihlengeni nizinakekele izihlahla zezithelo enizifika kuleyo ndawo. Zivuneleni nje nizidlele izithelo kodwa ningazigawuli izihlahla. Akuzona izihlahla eziyizitha zenu! Eningazigawula yilezo nje kuphela ezingatheli izithelo ezidliwayo. Ningabiya ngazo amadlangala enu, nivive nize ninqobe.

iviyo lezikhuthali
obanjiswaneni lokuhumusha nokubhala kabusha ibhaybheli ngesiZulu
- biblia zuluensis -

